

NADEIHNA BANG!

Christu Topa in eite ngetden dingin thungetna honghilh a, tua thungetna pen, Topa honghilhsa thungetna (Vantung thungetna) ci-in min i pia hi. I piakmah bangin, Topa honghilh taktak thungetna ahihi. Tua thungetna sungah: Vantungah nadeih na akicin mahbangin, hih leitungah zong kicing ta hen - ci-in, hong ngensak hi. Hih thungetna sungpan in, "Hih leitungah zong nadeihna kicingta hen," cih kammal in bangkhiatna nei a, Topa in bangtaktak ngen in hongsaawl hiam cih i ending hi.

"Hih leitungah zong nadeihna kicingta hen," cih thungetna i nget ciangin, i lungsim sungah, Topa deihna in bang tak tak ahikha ding hiam? Topa in kei bang angen dingin hong deih hi ding hiam? Topa in hi leitungah kei hong zangin bang semnuam hi ding hiam? Tuni tuhun laitak in, Topa in amadeih na bang hong bawlsaknuam hi dinghiam? - cih dotna tampi te i lungsim sungah honglut hi. Tua banah, Topa tungah "nadeihna kicingta hen," i cih ciangin, Topa in keitungpan bangdeih hi ding hiam? Ama deih ding kei tungah, kei sungah bang omhi dinghiam cih dotna te in zong hong behlaplai hi.

Topa hong hilhsa thungetna (Vantung thungetna) ngen kawmkawm in, khatveivei i lungman mahmah thukhat oma, tua in, Topa deihna banghi a, kei deihna banghi dinghiam? Kei deihna pen Topa deihna suaksaknuam kha kahiam? Thu ka nget ciangin Topa nadeihna bangin honghehpih in cih lungsim puakzia te kaneihding sangin, Topa aw ka deihna bangin hong pia mengmeng in cikha denzaw kahiam? Tua hi leh bangci thungetna ngending a, koici bang thupha ama tungah kangen dinghiam? - cih dotna te ii aphid i muzo keizel hi. Hih thu i tel theihna dingin mihing nihte thungetzia i ending hi. Tua mihing nihte sungah amasa pen i etding mi in, tua bang thungetna hong hilh Christu Topa mah ahihi. Gethsemane huan sungah Topa in: Pa aw ahih theihleh hih ka dawnding haitawh hong kipelh sakin. Ahi zongin keideihna bang hilo in, nangma

deihna bang hizawta hen (Lk 22:42) ci- in, khua-ul sisan luangliangin thu nangenhi. Tua bangin thu angetzawh asawtlo in khuahongvak a, Singlamteh tungah thah dingin kipaipih in, sihna hongthuak hi.

Anihna i etding mi in, tua Christu ii Nu, Siangtho nungak Maria ahihi. Vantungmi in nau napaai dinghi ci-in, agen hun lai takin: Nagen bangin keitungah piangta hen. Kei mahin Pasian' sila nu kahihi (Lk 1:38) ci-in, nadawngkik hi. Tua zawh kum 30 khit ciangin, atapa kithahna Singlamteh nuai ah, khitui tawh ding ngiungeu in, ata luang a angah tawi kawmin, mite in ganhing sanga asimmawhzawh atapa angpom in, Pasian deihna hi ci-in, kamkhat beek Pasian ahi a, mite ahi zongin mawhsakna, lungkimlohna, hehna, lungkiamna te omhet lo in, "nadeihna hi ven maw, Topa," ci-in na um tentan hi.

Hih minih te etteh kawmin thungetzia ding pawlkhat i ensuk lai dinghi. Hih minih te in ei tuhun Christian te adingin bangci bang thungetzia, koici bang thungetna te i neih nading in hong hilhhiam i cih ciangin, thu i nget ciangin:

a) Pasian deihna banghi a, Pasian in kei bang hihdinga hong deihhiam cih ngaihsut kawma thunget theihding

b) Eideihna masa sak in, eideihna khempeuh, ei deihsang a i ngahnop na lungsim te nusia in, eideihna te khempeuh ama deihna banga hongpiak nanging thu i ngettheih nading,

c) Ei deihsaleh ama deihna hong kituakdenlo ding ahih man in, ama deihna hongpiak ciangin, khitui luanhun, khua-ul sisan luan hun omdinga (Topa Jesu thungetna zia), Tonu mahbang in, pauding nangawn i theih nawnlohun omdinghi cih thu theikhol tawntungin, tua banga ama deihna i ngahna tawh, eite lamet ngamloh, lamet theihloh liang ahi, asangzaw leh alian zaw thupha hongpiak nang hi, cih thu uptentan na i neihding, cih thute hong phawksak hi. I thungetna ziate lungngai kik kawmin, khat le khat itna tawh thu kingetsak in, tha kipia tawntung ni. Amen.